

Level: B

Plata de lëur per l'ejam a usc

Tëmp per se njenië ca: 10 menuc

L'ejam a usc ie partì su te doi pertes: te na prima pert giapëis n test ladin da liejer y capì cun cater dumandes da njenië ca per la segunda pert, la conversazion a usc. Ntan la conversazion a usc respundëis ala dumandes y la cumiscion possa mo fé dumandes liedies sëuraprò.

1 Storia dl alpinism y turism

2 Danter l'19ejim y l'20ejim secul possen usservé tla valedes ladines na gran
3 cumpëida de scumenciadives: l'turism se svilupea, n frabica la streda dla Dolomites,
4 i crëps scumëncia a unì valorisei coche funtana de davani mpurtanta mpede unì
5 udui, aldò dla credënzes populeres, sciche lueges ncherscëules y da temëi.
6 L'ijulamënt devënta mënder y la stredes y la ferates uega ala jënt per se muever plu
7 saurì da n luech al auter; n possa almanco se semië y proieté per sé nstësc na vita
8 defrënta da chëla vivuda dai nëinesc, fata de usanzas, de stënta y sparani.
9 L'tëmp ie bon per chëi che à de gran ideies y vel' pitl mesun, per chëi che ie n pue'
10 da uem y che à l'snait de ti jì ancontra al nuef y de mudé pruspetiva.
11 Te uni valeda nen iel de tei che mët man a fé i osc, che lëura coche hotelieres o te
12 na utia da mont o che devënta mëinacrëp – funtanes de davani nueves, che vën dal
13 turism y che se sviluperà tl daunì te duta si formes che acumpanieia o barata ora la
14 funtanes de davani tradiziuneles.
15 N gran svilup à tla segunda metà dl Otcënt l' fenomen di viagiadëures y
16 espluradëures, dantaldut nglëisc, che va ncantëur a scuvierjer la valedes dla
17 Dolomites sun mui o clavei o ulache l'ie mesun monce cun la cales.
18 I vën menei ncantëur da acumpaniadëures dl raion, i fej vel' arpizada y a cësa
19 publichei pona si diares de viac te zaites o libri fajan cunëscer nsci la Dolomites.
20 Tosc do i viagiadëures nglëisc vëniel adalerch i alpinisc tudësc y austriacs;
21 autramënter che i seniëures nglëisc, per chëi che l'viac ie na vacanza che ti dà
22 l'ucajion de mparé a cunëscer la cuntreda dla Dolomites te duc si aspec, ie l'fin de
23 chisc ultims dantaldut alpinistich y sportif.

- 1. Ciunes fova pa la scumenciadives danter I 19ejim y I 20ejim secul tla valedes ladines?**
- 2. Ciuna fova pa la funtana de davani nueva?**
- 3. Ciuni fova pa i prim viagiadëures che univa tla valedes dla Dolomites?**
- 4. Ce mpurtanza à pa I turism al didancuei?**
- 5. Dumandes liedies.**